

Wenn du vff einem Thurn werist/ vnnnd du woltest daruff
 in ein wytte über ein Wasser zu einem anderen Thurn
 messen/ so in der Figur mit dem Buchstaben C. verzeich-
 net ist: so thu im also. Nimb das Instrument vnd gang zu ei-
 nem Fenster vff dem Thurn/ so in der Figur mit dem A. verzeich-
 net ist/ vnd mach das Instrument an den Steckten by dem Buch-
 staben K. vnnnd mach den Steckten vnder dem Fenster auch vest:
 demnach ruck die Standregel die sytten/ so mit dem Buchstaben
 c. Senckelrächte vnderwärts zu dem grund des Thurns (da du
 den anderen Stand nehmen kanst) so mit dem B. verzeichnet ist/
 vnnnd mach dann das Instrument also vest: Demnach ruck die
 Regel so mit dem Buchstaben d. verzeichnet ist/ an das ort/ so in
 der Figur mit dem C. verzeichnet ist/ desse witte du begerst zu wüs-
 sen/ vnd mach das Instrument vest/ vnd sihe vff dem Winckel-
 hacken/ so mit dem Buchstaben e. (so ich im vorigen Büchli die
 halbrunden Schyben genempe hab) verzeichnet ist/ was die Re-
 gel mit Buchstaben d. für ein Grad oder Puncten abschnydt/
 Exempel 140. grad/ die behalt gar fleissig vnd mach ein pünctlin
 In das Wags dan weñ du zu dem vndern stand kumbst/ must du
 die Regel wider vff den 140. grad oder puncten legen: Demnach
 nimm ein Sänckel vnd miß von dem Centro a. so vff dem Instru-
 ment verzeychnet ist/ hinab da du dir den anderen stand erwellet
 hast/ wie vil Schuch es sene: ich wil sezen du habist funden 100.
 Schuch: demnach nimm das Instrument hinweg vnd mach ein
 ander gemerck dahin/ vnd gang hinab vnnnd steck den Steckten mit
 dem stefft in die Erden/ vnd mach das Instrument an den stecken/
 wie es oben auch daran ist gesyn/ vnd ruck die Standregel/ so mit
 dem buchstaben b. verzeichnet ist/ hinuf zu dem gmerck/ so du o-
 ben gemachet hast/ vnd ruck sy/ daß sy just in den Sänckel gerichte
 sey/ wie du in der Figur sihest vff gerissen. Demnach ruck die Re-
 gel so mit dem buchstaben d. verzeichnet ist/ vff den 140. grad oder

B